

Sunday, April 19, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



MUHCS

Mizoram Universal Health Care Scheme(MUHCS 2.0)-a inziah luh theih hun pawhsei a nih hma April ni 15 thleng khan mi 31,671 an inziaklut tawh.

Mizoram State Health Care Society (MSHCS) Chief Executive Officer (CEO) Dr Lalhriatzuali Ralte hnen atanga Akashvani News Aizawl thudawn danin, kumin February ni 16 atanga tun thla April ni 15 tlai dar 3 thleng khan MUHCS 2.0 hnuaiah hian online leh offline kaltlangin mi 31,671 an inziaklut tawh a. Chung zinga mi 31,333 te chu online kaltlanga inziaklut niin, mi 338 te chu offline a inziak lut an ni. Dr Lalhriatzuali Ralte chuan mipuite chu MUHCS a inziah luh hun tawp ni May ni 15 chu bawhpelh lo

turin a chah a, hemi hnu hi chuan la inziaklote tan grace period an hawng tawh dawn lo tih a sawi a ni.

Mizoram sawrkarin a ruahmanna hmasaah chuan kumin February ni 16 atanga tun thla April ni 16 thleng khan MUHCS 2.0 hnuaiah man chawia online-a in ziah luh hun hawn a ni a. Tun thla April ni 1 atang khan MUHCS 2.0 hi a taka hman tan niin, April ni 2 atang khan Internet that lohna khua 269-a health sub centre-ah te offline hmanga inziah luh theihna hawn tan a ni bawk a. Hetihlai hian Ningani kalta khan Mizoram sorkar chuan MUHCS-a inziah luh theih hun hi thla thar May ni 15 thleng a pawtsei a ni.



HRUITEZAWL VISIT

Lai Autonomous District Council (LADC) Chief Executive Member (CEM) Pu C. Lalsawmzuala'n thenawm ram Myanmar nena sumdawna kal mekah inkhuahkhirhna tha leh mumal zawk kalpui chu thil pawimawh tak a ni tih tarlangin, ruahmanna felfai zawk siam a kalpui a ni ang a ti.

He thu hi Lawngtlai district bawrhsap Pu Donny Lalruatsanga nena Myanmar ramri a insumdawn tawna pawimawh ber Hruitezawl an tlawh tumin Pu C. Lalsawmzuala hian a sawi a. Chhimtuipui lui dunga Lawng chetvel dante, bungrua lut leh chhuakte chu Council sawrkarin awmze nei zawka kalpui a tum tih a sawi a. Hruitezawl chu ramria awm a nih angin, kawng hrang hrangah fimkhur thiam a tul dawn hle tih sawiin, thahnem ngai taka ram leh hnam tana thawk turin a fuih a. Kawhtlang hruaitute leh sawrkar inkarah thawhhona tha tak a awm a tul hle thu leh , thawhhona tha zawk awm turin thawhpuih sawmin, mamawh an neihte ngaihsak a tum thu a sawi a ni.

Lawngtlai Bawrhsap Pu Donny Lalruatsanga pawhin Hruitezawl chu Myanmar nen insumdawn tawna hmun a nih angin, dan lova ramdangmi luhna remchang a zau hle tih sawiin, heng lakah hian khawtlang hruaitute chu fimkhur turin a chah a. Tun dinhmunah Hruitezawlah raltlan in 300 vel awmte pawh sorkarin a hriatpui

tih sawiin, thlithai reng an ni a ti a. An khawsak leh chetvelna kawngah dan kalh a awm leh awmlah chik chu a pawimawh hle tih sawiin, hemi kawngah hian khawtlang hruaituten theihtawp lo chhuahpui turin a sawm a ni.

Pu C. Lalsawmzuala leh Pu Donny Lalruatsanga te hian Hruitezawl chhaka khualzin te tlawh hlawh tak ' 'Bawinu' an tlawh nghal a. Khuanun a duan hmun mawi leh ropui tak mai Lawngtlai District leh Siaha District- in a nei chu District pahnih tan vanneihna a ni tih tarlangin, heng hmunte hi a nihdan tidanglam lo va, a tlawhtuten awmlsam zawka an tlawh theih dan turte, a hmun hma chei that leh hahchawlhna remchang zawk siam kawngah hmalak a nih tur thu an sawi a ni.



EMCC VIOLATIONS

Naktipa vote thlak tur Aizawl Municipal Corporation (AMC) inthlan a inthlanna dan election model code of conduct (EMCC) bawhchhia a puhna 8 State Election Commission-in a dawng.

State Election Commission hotute'n Akashvani News Aizawl an hrilh danin EMCC bawhchhia a puh zingah hian Principal Chief Conservation of Forests (PCCF) leh Directorate of Information & Public Relations a Director-te chu Environment, Forests & Climate Change department a LDC hna 15 lakna tur advertisement chhuah ah puh an ni a, advertisement chhuah hi EMCC kalh a nih avangin department hotute hi State Election Commissioner hma a inlan tura koh an nih hnuah, an advertisement chhuah chu cancel tir leh an ni. He'ng department 2 bakah hian Minister 3 - Pu C. Lalsawivunga, Pu PC Vanlalruata leh Pu B. Lalchhanzova te bakah Lok Sabha MP Pu Richard Vanlalmangaiha, Adviser to Chief Minister Pu Lalmuanpuia Punte leh AMC Ward 18-na a ZMC candidate Pu K. Lalrodinga te lakah EMCC bawhchhia a puhna a lut bawk a. Heng mite hi insawifiah tura tih an ni a, an insawifiahna leh finfiahna an neih an thehluhte chu ngun taka endik a nih hnu-ah State Election Commission chuan an insawifiahna chu pawmsakin EMCC bawhchhia a puhna chu a ti tawp ani.



PED VOTING

Naktip a Aizawl Municipal Corporation (AMC) ward 19-a inthlan vote thlak turah inthlanna buaipuitu mi 1,328 in vote an thlak.

State Election Commission atanga thu dawn danin AMC inthlan buaipuitu tur an nih avanga vote thlak ni a vote thlak hman ve lo tur (person on election duty)-te tan vote lo thlak lawk theihna hun hi hawn a ni a. He tianga vote thlak lawk tura inziaklut mi 1,530 zinga mi 1,328-in nimin thleng khan vote an thlak a. Inziak lut si vote thlak lo hi mi 202 an awm a ni. Inthlan buaipuitu turte hian naktuk hian an duty-na tur hmun an thleng vek tawh tur a ni.

